

[Augsburg], 9. April 1571

An Hugo Blotius

ÖNB Wien, Cod. 9737<sup>z</sup>, Kassette I (Nr. 14), fol. 41r.

S. Neque discessus Argentina tuus, Clarissime vir, ubi te frequentia et studijs auditorum florere acceperam, probatus mihi fuit: neque non illuc reuerso (quod tuo commodo futurum et spero et opto) ex animo gratulabor: neque tibi tantum stabilem sedem, firmumq[ue] domicile: sed et Academiae, propter et doctiss[imorum] aliquot virorum obitum, et professorum dissensiones, penè ruinam minitanti, firmum columen, et ornamentum, ἄνδρα φημὶ ἐπ’ ἄκρον τὲ παιδείας ἐληλακότα, καὶ διδακτικὸν, καὶ πολυίστορα: καὶ, τὸ μέγιστον, τοῖς ἀκροαταῖς, ὃν οἱ πλεῖστοι ψυχαγωγεῖσθαι μᾶλλον ἢ παιδεύεσθαι ἐπιθυμοῦσι, κεχαρισμένον. Hoc meum de tua praestantia iudicium Argentinam ad eos perscripsi, quos scio vel tua vel mea etiam causa facturos esse omnia, daboq[ue] operam, vt responsum quam primum habeas, quale optas. Cuius voti compotes ubi facti fuerimus: fortassis accendent luculentae nuptiae: à quibus aetas tua non debet abhorrere. ἀλλὰ ταῦτα μὲν θεοῦ ἐπὶ γούνασι κεῖται. Meum verò studium et commodis et dignitati tuae nunquam est defuturum. Vale et Hutteno nostro meo nomine S[alutem]. 5 idus Aprilis 1571.

Hiero[nymus] Wolfius  
Tuus.